

PILLIMON

Poll-ni Yi PILLIMON Pepá Topa Sirim Bukele

Poll-ni Pepá Topa Sirim Ilinga Ung-Pulu Mare

Poll molupa tirim mele ung-pulu mare kene yu-ni pepá topa sirim-manga ung-pulu mare kene buk-gomú 682 molemú.

‘Pepá ili Rom ka-lkuna pepa kene turum.’ niku piliilimili. ‘Epesas kene Pillipai kene Kollosi kene taon akumanga yambumanga pepáma yu ka-lku tiluna pepa kene turumko.’ niku piliilimili.

Pillimon yu yi-auliele molupa yambu mare yunga kongun we kende-mande tenjiku méle kaluli naa liili yambuma nokupa mulurum. Yunga kongun we tinjili yi te, Onesimas niliele, takara topa kolea-auli Rom purum kene Poll-nga ungele piliipa numanu topele topa ‘Krais sika.’ nimba tondulu mundupa piliirim. Pe yu-ni Poll nukurum.

Kongun we kendemande tinjili yambuma takara toku pulimelé kene Rom-gapmaneliinga ung-mani te-ni nimba mele: ‘Aku-siku mong liingéliinga “Pundu tangi.” niku toku konjai.’ nimba pirim. Akiliinga-pe Poll-ni Onesimas numanu monjupa Pillimon pepá topa sipa kene nimba mele: ‘Yu alsukunu lkuna liikunu “Ang.” nikunu táka-niku nukui.’ nirim. Akiliinga-pe Poll-ni Pillimon aku-sipa mele mawa tembandu sumbi-sipa naa nimba ui ung mare we niri-maliinga ung marenga ung-pulele mindili sipu

piliilimulu. Takara topa purum yi Onesimas-nga bili kolomong-kelú 10 pulu monjupa nimba, pepále topa pora simbandu kamu ung te mawa tirim.

Ya ung-pulele pora nikem.

**1-25 pali Pillimon-nga Kongun
We Tinjili Kendemande-Yili Ui
Takara Topa Purum, Yi Akili
Penga Numanu Topele Topa
Krais-nga Yili Mulurum Kene
Poll-ni Yu Pillimon Mulurumna
Kelepa Liipa Mundurumeliinga
Ungele**

*1-3 Poll-ni Pepále Tombandu Pulu Monjupa
Turum Ungele*

¹⁻² Na Poll, Krais Yesos-nga kongun ten-jiliáliinga ka-lkuna peliu yili, na kene oliunga angin Timoti wasie molupulu kene pepá ili topu siker.

Olsunga aima pulu lelemú yi Pillimon, tapú-topu kongun telemulu yili, nu kene, oliunga kimulu Apia kene, oliu wasie tapú-topu ele tili yi Akipas kene, Krais-nga yambu-talape Pillimon nunga lkuna máku tolemele yambuma kene, eni pepá ili topu siker.

³ Oliunga Lapa Pulu Yili kene Auli Yesos Krais-seleni eni we kondu kolkulu, ‘Eni numanu waengu nipili táka-niku molangi.’ niangli.

4-7 Pillimon Ulu-Kaíma Tewa Mulurum Mele Piliipa Kene Poll-ni Numanu Sipa Pulu Yili-Kene “Angke” Nirim Temanele

⁴⁻⁵ Nanga pulu lelemú yi ɿPillimonɿ, nu Auli Yesos ɿmolupa, oliunga nimba tinjirim mele tenjilimále, ‘Sika’ nikunu tondulu munduku piliikunu molkunu, Pulu Yili-nga yambuma pali numanu monjukunu mollu mele piliipuliinga Pulu Yili-kene popu topu ung nimbúndu takitaki nunga mawa tenjipu, nanga Pulu Yili-kene “Angke” niliu. ⁶ Pulu Yili-kene nunga mawa tenjipu kene, ‘Nu-kene oliu ɿYesos Kraís, sika.’ nimbu tondulu mundupu piliilimuláliinga numanu tiluna pupili tapú-topu molemulu ulele-ni nu aima piliipa kungnjuliele sipili. Piliipa kungnjuli akili pemba kene Kraís-nga méle kaí oliu silimú lilimuluma kamu tondulu mundukunu piliani.’ niliu. ⁷ Ang, nu-ni Pulu Yili-nga yambuma numanu monjukunu kene numanu kaí pípili mulungí uluma tinjirinu mele piliipuliinga na numanu sipu numanu aima tondulu pupili moliu.

8-22 Poll-ni Pillimon-ndu “Onesimas Kelku Lkundu Liikunu Kene ‘Nunga Kandi-Angin Mele Mulupili.’ Ni.” Nirim Ungele

⁸ Na-ni nu ulu te “ti.” nimbu mawa tembu teker akili nu-kene olsu Kraís-nga yisele molemuláliinga “Nu-ni aima sika ti.” nimbu tondulu mundupu kapula nilka akiliinga-pe ɿnu-ni tellu mele niker aku-siku molkunu Pulu Yili-nga yambuma kondu kolkunu tellu, akiliinga ⁹ ɿaku-sipu naa nimbú,. Numanu munjuli ulele-ni olsu liipa

tere lenjipa ‘Tiluna molambili.’ nilimú-na aku-sipu molembuláliinga na-ni ,“Nu i-sikunu ti.” nimbu tondulu mundupu naa nimbu, “Ulu te teani.” nimbu, nu táka-nimbu mawa tembu teker. Sika na Poll, na yi-andale, Krais Yesos-nga kongun tenjiliáliinga ka-lkuna peliu, na aku-sipu yili moliáliinga ¹⁰ nanga málu Onesimas-nga mawa tenjipu kene “,Pollimon, nu-ni ,Onesimas, yu tekunu konjani.” niker. Na ,Poll, ka-lkuna pepu ,Onesimas, yu ungma nimbu sirindu kene yu ,numanu topele topa, ‘Sika’ nimba tondulu mundupa piliipa ,Krais-nga yili, mulurum mele molemáliinga ekupu yu nanga málu ,mele, na yunga lapale moliiu. ¹¹ Ui sika yu-ni nunga kongun kaí te mimi-sipa naa tinjirim akiliinga-pe ekupu nu-kene olsu wasie yu-ni mimi-sipa liipa tapunjupa kongun tenjimba yili molemú.

¹² Ekupu yu nu molluna “Kelkunu pui.” niker akiliinga-pe okum kene na aima numanu buni tekem. ¹³ Na-ni temani-kaiéle topu silsiliipu andurundeliinga na liiku ka siring kene ka-lkuna peliáliinga Onesimas-ni nunga alko topa “Na liiku tapunjukunu ka-lkuna nokani mului.” nilka ¹⁴ akiliinga-pe “Nu-ni aima sika na liiku tapunjani akiliinga nu molluna yu ui naa upili. Yu pipi sipu nunga nimba na liipa tapunjupili.” nimbu we karaye tepu naa nimbú. ‘Nu-nunu numanale-ni piliikunu kene teani.’ nimbu ‘nu molluna yu upili.’ niker. ,Nu molluna ombá kene yu penga molupa temba mele nu-nunu pi liani!,

¹⁵ Pe nu mulunina ,Onesimas, alsupa sukundu omba nu-kene kam-kamu molumbandu yu ui laye-selenga nu molluna mundupa kelepa kolea

tenga purumunje. ¹⁶ Akiliinga-pe aku lem yu nunga kongun we tinjili kendemande-yili mindi molumbandu aku-sipa ulele wendu naa urum. Yu sika nunga kongun we tinjili yili molemú akiliinga-pe ekupu akili mindi mólu. Ekupu nunga angenale kepe molumba kene nu-ni yu aima numanu munjunéliinga aku-sipa mele ulele wendu urumunje. Na-ni Onesimas aima numanu monjupu ‘Yu nanga aima sika kandi-anginelenje.’ nimbu piliiliu. Pe yu-kene nu-kene wasie Auliele-nga angininglu-sele mulungléliinga kepe, yu nunga angenale molupa kendemande-kongunale tenjipa konjumbaliinga, ‘nu-ni Onesimas yu numanu monjuni mele olandupale, na-ni yu numanu monjuliu mele mandupa.’ nimbu piliiker.

¹⁷ Akiliinga, ‘Na nu-kene wasie Krais-nga kongunale tapú-topulu telembulu.’ niku piliillu lem na olka kene “Wasie molambili ui.” nilkena mele Onesimas, yu ombá kene “Wasie molambili ui.” niani. ¹⁸ Onesimas-ni nu-kene ulu te tepa kis-sirim, mola yunga pundu te nu-kene angilirim lem akuma Onesimas-ndu “Pundu tui.” naa nikunu, munduku kilui. Pundu akuma pali na-ni tombáliinga nanga bili tunjui. ¹⁹ Na Poll, nananu pundu akuma tombaliinga nanga kili-ni nanga bili pepá ilinga tokur. Akiliinga-pe nu na-kene pundu te angiliimú, ‘pundu akili naa nindu lem nu we piliikunu mollu.’ nimbu piliiker. Nu na-kene pundu angiliimú akili, na-ni nu liipu tapunjurundeliinga nu kona molku konjukunu mindi puni ulele nu-kene pelemú kanili. ²⁰ Ang, ‘Auliele-nga kongun te tenjambu.’ nikunu na

liiku tapunjukunu ulu kaí te ti. Olsu Krais-nga yisele molembuláliinga nu-ni na numanu kaí pípili ulu te ti. ²¹ Na aima mimi-sipu piliiker: ‘Na-ni “Ti.” niker ungele nu aima piliiku liikunu tiní.’ nimbu piliipuliinga pepá ili nu topu siker. ‘Na-ni nu “₁Onesimas-kene₁ teani.” nimbu mawa teker akili nu-ni aima olandupa yu liiku tapunjukunu tiní.’ nimbu piliiker.

²² Na ung te wasie mawa tekerko: Na piliikerele, ‘Eni Pulu Yili-kene nanga niku popu toku mawa tenjilimele mele yu-ni piliipaliinga ‘Na eni molemelena wambu.’ nimbá.’ nimbu piliiker. Akiliinga ‘na nunga lku ombu pembáliinga lku-sulumina te teku mimi tekunu nosunjuí.’ ₁ nimbu mawa teker₁.

23-25 Poll-ni Pepá Topa Pora Sipa Kene “Mului.” Nirim Ungma

²³ Yi Epaporas, yu Krais Yesos-nga kongun tinjirimeliinga yu ka siring, ekupu olsu wasie ka-lkuna tapú-topulu pelembulale, yu-ni “Nu kapula molluye?” nimba, nimba mundukum.

²⁴ Na-kene wasie tapú-topu kongun telemulu yi Mak kene Aristakas kene Dimas kene LLuk kene enini “Nu kapula molluye?” nikimiliko.

²⁵ Auli Yesos Krais-ni eninga minima we kondu kolupa mulupili molai.

₁Aku manda niker₁.

PULU YILI-NGA UNG KONALE
The New Testament in the Mara-Gomu dialect of the
Bo-Ung Language of Papua New Guinea
Nupela Testamen long tokples Bo-Ung (Mara-Gomu)
long Niugini

copyright © 2004 Wycliffe Bible Translators, Inc.

Language: Bo-Ung (Mara-Gomu) (Bo-Ung)

Dialect: Mara-Gomu

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

PDF generated using Haiola and XeLaTeX on 11 Nov 2022 from source files dated 22 Nov 2019

0847fea8-9710-5ee4-ae4e-ab1d0724af7d